



第二册

光緒朝東華錄

光緒八年（公元一八八二年）起
光緒十三年（公元一八八七年）止

光緒朝東華錄

光緒八年壬午

春正月

1 戊子朔。寅刻。上詣奉先殿行禮。巳刻。詣大高殿、壽皇殿行禮。

2 己丑。諭。恩福等奏特參知縣虧短交代請革職拿問查抄備抵一摺。奉天候補知縣馬承恩。在署遼陽州任內。虧短庫款銀三千二百六十四兩零。米價銀一萬五千五百兩零。攤款等項銀九百五十三兩零。在署錦縣任內。虧短攤賠各款銀一千九百四十六兩零。屢經勒催。迄未完繳。實屬玩延。馬承恩著即革職拿問。交崇綺等提集該員各任內經手丁書。訊明是侵是挪。按律懲辦。一面將寓所貲財嚴密查抄。並咨安徽巡撫將該員原籍家產查封備抵。以重帑項。

3 劉長佑等奏。准部咨。光緒七年閏七月初二日奉。上諭。給事中劉瑞祺奏各省抽釐設卡請飭權衡出入酌量撤留一摺。各省抽收釐金。疊經諭令核實辦理。如該給事中所奏情形。實屬無裨國計。著各該督撫將各釐卡出入數目。悉心總核。酌量撤留。報部備查。不得以空言塞責。將此通諭知之。欽此。恭錄咨行到臣。仰見皇太后、皇上聖慮周詳。勤恤民隱。跪讀之下。感悚莫名。當即欽遵轉行查辦去後。茲據雲南釐金總局司道詳稱。查滇省釐金開辦之初。因邊徼遼闊。山路分歧。所設釐卡凡七十餘處。迨後疊奉清查。凡無濟於餉有累於民者。概從裁汰。此外或撤分局以添巡卡。或併近局以責兼收。現計共只存局二十五處。分布於十四府八十五廳州縣之地。均只能扼其要衝。至歷年各局收支銀數。並設局處所。委員銜名。自同治十三年及光緒元年定章後。均經按年造

冊報部在案。現在各局抽收尙能照章。並無弊竇。局卡亦爲數無多。應請暫仍照常辦理等情。具詳請奏前來。臣等覆加察核。尙屬實在情形。查滇省陸路抽釐核計收數。尤較各省減少。且臣等疊次欽遵諭旨。已將各局處所及收支銀數。歷年報部有案。其零星釐金。亦已疊示禁革。滋弊委員。並疊經分別撤參。年來辦理尙皆核實。第以二十五局分布全省。固未能杜奸商繞越。已足舒生計於貧民。局所既屬無多。需用現方孔亟。自應暫仍其舊。俾得挹注有資。臣等仍當察度情形。如有可撤之處。仍卽隨時裁汰。總期無累商民。有裨釐務。以仰副訓諭殷肫之至意。報聞。

4 裕祿奏皖省候補人員仍形擁擠。請再展停分發一年。下吏部知之。

5 庚寅。上詣大高殿祈雪。

6 辛卯。諭。謙禧等奏軍臺廢員由配脫逃。請旨飭緝懲辦一摺。廢員趙清韶。膽敢由配脫逃。難保不潛行來京。或逃回原籍。著步軍統領衙門順天府五城御史及山東巡撫一併嚴拿務獲。解部訊辦。

7 諭。謙禧等奏軍臺廢員由配脫逃。請旨飭拿並將管站各員議處一摺。廢員雙全。膽敢由配脫逃。難保不潛行來京。或擅自回旗。著步軍統領衙門順天府五城御史吉林將軍一體嚴拿務獲。解部訊辦。管站部員理藩院郎中崇壽。筆帖式文瑞。於雙全脫逃時漏未呈報。殊屬顛預。均著交部分別議處。

8 李明墀奏。洞庭一湖。爲東南巨浸。周圍八百餘里。水落之時。尙有沙洲間隔。分爲東西兩湖。春夏水漲。則合而爲一。萬頃汪洋。茫無涯涘。行旅視爲畏途。東湖危險之處。以九馬嘴爲最。每遇暴風。波濤洶湧。往來舟楫覆溺無算。從前特設鹿角救生局。專收九馬嘴一帶浮屍。每歲多至三四百具。其附近地段。有所謂折船廠。萬人堆救命港等項名目。具載志乘。一切慘酷艱危之狀。如在目中。至迤西湖而寬廣。尤倍東湖。爲雲、貴兩省及常、澧等屬水路要道。舟行必須橫截湖心而過。三百里內無停泊之處。猝遇狂風。束手待斃。又其地水勢停蓄。冬令嚴寒。易致冰凍。往往船爲冰阻。進退兩難。或食盡而冰未開。或竟有全船餓斃者。故東湖危險。在春杪以逮秋仲。西湖則

並及冬盡春初。伏查雍正九年。仰蒙世宗憲皇帝詳考圖志。洞悉情形。特降諭旨。發給營田水利項內平餘銀二十萬兩。交前湖廣督臣邁柱。湖南撫臣趙宏恩。於西湖適中之舵桿洲建築石臺。並於四面建堤各數十丈。悉用堅石砌成。以爲行舟避風之所。臺上立營房以駐汛兵。立店房以便貿易。風起則趨避有地。灣泊則防護有資。冰凍則接濟有賴。天恩高厚。至今感戴不忘。惟臺峙湖中。風波搖撼。軍輿以後。不及大加修培。以致日就傾圮。僅存亂石。冬令水涸。尙可藉以泊舟。而營房店房均經坍塌。深夜多盜賊之虞。膠淺無薪米之恃。若值湖漲水高。既難停泊。而亂石隱伏水中。舟行尤多攔碰之患。蓋一歲之中。失事者幾難以數計也。查東湖九馬嘴。光緒四年經紳商人等稟請於山後別開新河。使上游船隻可以直趨鹿角。由萬石湖入新河以達九馬嘴之北。下游船隻一過扁山。亦可稍依湖岸入新河。繞出九馬嘴之南。中間一段險地全行避去。數年來河開之後。九馬嘴以下竟未損壞一船。鹿角救生局起獲浮屍。比前不及十分之一。此項工程。半由紳商人等捐資辦理。現已一律告竣。極著成效。嗣後遇有淤墊。祇須設法籌款。隨時疏濬。以爲經久之圖。其西湖舵桿洲應修工程。臣於五年冬到任後。即經派員前往履勘。查明舊石僅有其半。湖身淤墊。入土頗深。勢須多購石料。加高砌築。方可有裨。以時方開濬九馬嘴新河。力難兼營並舉。且計工費甚鉅。湘省物力有限。必須九馬嘴蒞事後。合湖南北兩省之力。設法通籌。集成巨款。方可接續興辦。茲新河幸已竣工。微臣適交卸在即。深念此項工程。攸關於民生利病甚大。未敢以事非己責。緘默不言。應請勅下湖廣督臣暨新任湖南撫臣會商。籌款遴派委員估勘修築。成此要工。庶先朝良法美意。有舉莫之敢廢。而商旅往來。益沾利賴於無窮矣。上諭。李明墀奏請飭修洞庭西湖舵桿洲要工一摺。洞庭湖南巨浸。船隻往來向稱危險。經李明墀於東湖九馬嘴地方別開新河以避風浪。商旅稱便。惟西湖舵桿洲堤工等項。極關緊要。亦應接續修整。著李瀚章。涂宗瀛會同籌款勘估興修。以重要工而利行旅。

乙未。左宗棠奏。臣欽奉恩命補授兩江總督兼充辦理通商事務大臣。茲已馳抵江甯。接篆任事。竊維江南地廣事煩。洋務尤關緊要。臣以衰病之軀。謬當斯任。雖有生之日。皆報國之年。而智慮難周。深虞貽誤。況親承慈

訓以得人而理。藉分勞勩爲先。尤當加意搜求。聊資指臂之助。竊見二品頂戴布政使銜湖南候補道王加敏。公正廉明。操履篤實。與臣共事已久。相知最深。前委辦理臺局各務二十餘年。事必躬親。人言無間。鹽運使銜甘肅儘先補用道周崇傳。品清望峻。剛明耐苦。操守之嚴。實一時所僅見。洵堪鎮浮式靡。如蒙俞允。應請旨飭下陝甘督臣催令該員等迅速前來。俾資委用。至王加敏所遺陝甘後路糧臺。需員接辦。臣已緘商欽差大臣督辦新疆軍務臣劉錦棠。陝甘督臣譚鍾麟。卽就近札委現署湖北鹽道惲祖翼接辦。必能勝任無疑。鄂臺諸務。久經王加敏經理。端緒可尋。而徵臣旣督兩江。所有應協西征餉項暨老湘營專餉。尤當盡力維持。隨時挹注。計可無虞。掣肘。上諭。左宗棠奏。請調員差委一摺。湖南候補道現辦陝甘後路糧臺王加敏。甘肅儘先補用道周崇傳。著劉錦棠。譚鍾麟。飭令該員等迅速前往江南交左宗棠差遣委用。

10 丙申。上詣太廟行禮。

11 丁酉。時享太廟。遣載勛恭代行禮。

12 諭軍機大臣等。翰林院侍講張佩綸奏。滙陳保小捍邊當謀自強之計一摺。據稱。江南形勢。當先海而後江。宜改長江水師提督駐吳淞口外。狼山。福山。崇明三鎮均隸之。專領兵輪出洋聚操。責大臣以巡江。兼顧五省。責提督以巡海。專顧一省。移江南提督治淮徐。轄陸路。閩。浙同一總督轄境。宜改福建水師提督爲閩浙水師提督。以浙江之定海。海門兩鎮隸之。浙江提督專轄陸路等語。卽著左宗棠。何璟。彭玉麟等將海防事宜通盤籌畫。會同妥議具奏。

13 戊戌。召維慶回京。以鄂禮爲駐藏幫辦大臣。

14 己亥。雪。

15 辛丑。上詣奉先殿。壽皇殿行禮。

16 祈穀於上帝。遣隆勲恭代行禮。

17 壬寅。上詣大高殿。壽皇殿行禮。

18 癸卯。鄧承修奏。自軍興以來。財用匱乏。加以水旱頻仍。供億繁費。會計之臣。東羅西掘。或害重而利微。或多而益少。徵稅銀不遺尺帛。於帑項無補絲毫。海內虛耗。百姓困苦。蓋未有如今日者也。夫天地生財。祇有此數。不在國則在民。今庫款無一歲之儲。閭閻鮮足食之家。既不在國。又不在民。臣熟思其故。博訪人言。雖耗糜多端。而其大要有二。一曰內府之浮冒。一曰關稅之侵蝕。浮冒之弊。諸臣已屢有陳奏。久垂聖鑒。無俟臣言。至於關稅侵蝕之弊。十餘年來。日增月盛。殆不可以數計。其見諸奏牘者。如前任兩廣督臣劉坤一。署理海關。纔數月耳。溢銀十餘萬兩。其實缺之吏胥僕役。又當倍是可知。柯玉棟一閱海關書吏耳。不數年而家資巨萬。捐納江蘇候補知府。書吏如此。則正任可知。至津海關。密邇近畿。其在人耳目。如餽遺過客。供應上官。歲須數萬金。皆取償於此。則飽入私囊。車載而歸者可知。他如上海登萊蕪湖漢口新關九江夔州廣州肇慶梧州歸綏道山海關。凡有權稅者。無不侵蝕。多者十餘萬。少亦七八萬。綜而計之。歲不下數百萬。今部臣晝維夜算。欲額外求一錢。辦公而不可得。而坐視此數十百萬之民膏民脂。悉付狼吞虎噬。而不問。此臣所不解也。且國家取民田賦而外。祇有權稅。所以裕國課資。正供。惟此二者而已。然錢糧之分數。卽州縣之考成。有侵蝕者。則監追參劾隨之。其考核之嚴如此。至於權稅。則賊私入己。纍纍數百萬。聞之如不聞。見之猶不見。譬如一家之中。主持者日數鹽問米。計及錙銖。至於豪奴悍役。侵尅其資財。私鬻其田產。而顧不之察。有是理乎。又不獨此也。因其貨利以結納長官。彌縫要路。既以差而得富。復以富而市官。賄賂日彰。官邪益著。吏治何由不壞。財用何由不竭。臣愚欲乞特派大臣廉介如前侍郎彭玉麟。精核如前撫臣丁日昌。閻敬銘。密查確數。據實參奏。並飭下各督撫所屬有關稅者。妥議章程。或於徵收溢額之中。酌留一二。以爲緩急辦公之用。其餘諭令悉數解部。年終開單呈覽。以備稽核。如有前項侵蝕情弊。或督撫扶同隱匿。別經御史糾彈。一併從嚴治罪。其差滿人員。果有行方履潔。盡公忘私者。朝廷擢其二。以示獎異。使賢者有所勸。而不肖者有所懲。裕國用而杜漏卮。計無逾於此者。或謂積痼已深。一旦革之。去一弊

更生一弊。窳一穴復開一穴。浮收需索之害。將更倍於曩時。臣以爲此不必慮也。臣之所慮者。在於紀綱不振。賞罰不行耳。夫黷貨者人之情。畏罪者亦人之情。彼見朝廷賞必信。罰必行。縱愛身家。獨不愛性命耶。昔齊威王爲政。烹阿大夫。封一卽墨大夫。而齊國大治。轉移之權。固操之自上耳。我皇太后皇上。誠大奮乾綱。將天下可立治。豈惟區區積弊可除哉。上諭。御史鄧承修奏。請飭查關稅侵蝕。以裕國用一摺。前據戶部奏。各省關稅有餘之處。除徵解足額外。應令各就徵收實在情形。按年溢解。當諭令該督撫監督等核實辦理。茲據該御史奏稱。關稅侵蝕之弊。日增月盛。不可數計。甚至吏胥僕役。中飽巨萬。殊屬不成事體。現在時事艱難。餉需支絀。亟應事力求核實。以裨國計。著管理關務之該督撫監督等。各就徵收實在情形。和盤託出。遵照部章。於正額盈餘外。按年溢解。朝廷意存寬大。亦不追其既往。經此次嚴諭飭查後。如再有掩飾迴護情弊。別經發覺。惟該督撫監督等是問。懍之。

19 楊昌濬奏。臣於光緒四年夏間。奉命幫辦甘肅新疆善後事宜。又於六年十二月內。奉上諭。楊昌濬著會辦新疆善後事宜。欽此。當即欽遵辦理。刊用木質關防。以昭信守。在案。茲查新任督臣蒞任後。現駐省城。與前督臣左宗棠督師出省駐紮前路。情形不同。所有新疆善後。似毋庸另派會辦。以一事權。俟命下之日。臣即將關防銷燬。報聞。

20 甲辰。以京師得雪。上親詣大高殿報謝。

21 乙巳。諭。奕劻奏。參委散秩大臣接班。到遲。請旨交部議處一摺。紫禁城內值班。例應辰刻入直。本月十七日。委散秩大臣盛啓。午刻始行接班。殊屬不合。盛啓著交部議處。嗣後各處值班王大臣。務當遵照定章。按時入直。毋得稍涉曠誤。致干咎戾。

22 丙午。諭。巡視東城御史阿彥泰等。奏請嚴懲倉匪。以重倉務一摺。上年海運倉開放俸米。有需索抑勒扣留等弊。花戶趙永泉及劉二。著刑部嚴訊確情。按律懲辦。並著步軍統領衙門。順天府五城一體查拿。張六卽張鳳

儀。解交刑部歸案審辦。

戊申。張樹聲等奏。准刑部咨。議覆御史胡隆洵奏請將盜案仍照舊例分別首從辦理一摺。請旨飭下各省督撫將軍都統府尹體察地方情形。迅速妥議具奏。統俟臣部彙核辦理等因。光緒七年閏七月二十五日奏。本日奉旨。依議。欽此。欽遵轉行妥議去後。茲據廣東按察使龔易圖體察各屬地方情形核議詳請具奏前來。臣等伏查各省盜風之熾。以粵東爲最甚。先於同治二年間。經前督臣毛鴻賓。前署撫臣郭嵩燾縷晰敷陳。欽奉上諭。廣東省廣州府屬及佛岡直隸同知拿獲匪犯仍行解省勘審外。其距省較遠之各府廳州縣所獲拜會從逆拒敵官兵者。及迭次行劫夥衆持械拒捕傷人罪應斬梟斬決各犯。由各該州縣審實後。卽解送該管道府覆審。錄供具詳該督撫審明情節確實卽飭令就地正法等因。欽此。又於同治十三年間。議覆御史鄧慶麟奏。飭令軍務肅清省分拿獲盜匪照例辦理案內。經前撫臣張兆棟以盜劫之風尙未止息。奏請仍照奏定章程就地明正典刑俾知畏懼等因覆奏。奉旨。刑部知道。欽此。欽遵各在案。原因此等悍桀之徒。往往明目張膽。肆無忌憚。不得不特設重典。立予誅。於辟以止辟之中。仍寓刑期無刑之意。現在各省軍務肅清。盜風較靖。誠宜次第規復舊制。恪遵辦理。以昭慎重。惟是腹地邊省。情形各有不同。因時制宜。寬猛期於相濟。近年來粵東所獲逆匪盜犯。各就地方遠近。或解省勘審。或由該管道府覆勘錄供具稟。皆係供證明確。罪狀昭著。始行批飭正法。就地懲辦。從未敢草率定讞。致滋冤濫。計自同治十三年間覆奏以來。迄今又閱數年。各處搶劫之風。雖較前略爲斂戢。第華洋雜處。山海錯綜。獷悍成風。一時終難猝變。其間出沒重洋擄殺。結黨拜會。任意橫行。甚至倚他族爲護符。踞山林爲窟宅。負隅抗拒。恃衆逞兇。如上年揭陽縣屬風吹寮各鄉匪徒田籠得等糾衆起旗謀爲不軌一案。幸該處地方文武查辦迅速。得以消患初萌。經將獲犯密辦情形奏報。本年復有長甯會匪李沙。婆七等結盟拜會。潛謀起事。亦據該地方文武擒獲首要匪犯多名。現經批飭解道審辦。容俟審明另行具奏。此外惠州府屬。民情頑梗。搶劫械鬪。相習成風。先經奏明齊會署陸路提督臣蔡金章。會同惠州府督飭所屬各州縣。分別強鄉弱鄉。酌量擇

尤重辦。現已議定章程。正值開辦伊始。伏莽則根株未盡。匪鄉則搜捕方殷。凡此巨懸積匪。稔惡煽亂之徒。董以嚴刑。猶恐伺隙思逞。漏網逃誅。若遽改歸舊制。逐一解省勘辦。而外府州縣。距省程途。遠則千餘里。少亦數百里。不第長途押解。囹圄聚處。固多意外之虞。且恐各屬以解省需費。賠累難支。因而消弭諱飾。貽禍養癰。反爲地方隱患。臣等體察情形。悉心斟酌。當茲盜風未息。捕務方殷之際。勢不能不請從權宜。以資整頓。擬請嗣後除廣州府屬及佛岡直隸同知拿獲逆匪盜犯。仍行解省勘審外。其距省較遠之各廳州縣。拿獲拜會從逆及夥衆持械搶劫罪應斬梟斬決各犯。仍照奏定章程。訊明錄供。解由本管道府覆訊明確。稟由臣等核明。批飭就地正法。仍將決過人數。按三箇月彙報一次。並逐案補具供詞。咨部備案。一俟伏莽全清。盜風止息。再行隨時奏請照舊辦理。下刑部知之。

24 庚戌諭。劉長佑等奏請留道員暫緩引見。並調員差委等語。雲南補用道沈壽榕。著准其暫緩引見。坐補迤西道陳席珍。前任大理府知府李衍綬。著吏部查明。飭令該員等前赴雲南交劉長佑、杜瑞聯差委。李衍綬並准其留於雲南補用。

25 子江西德化縣孝婦黃劉氏旌表。

26 丁寶楨奏。三巖野番劫殺洋人一案。前經臣寶楨會同前署成都將軍臣托克湍附片具奏。欽奉上諭。野番肆行劫殺。實屬兇頑。著丁寶楨、托克湍督飭派出官兵。並嚴檄該地方等務將滋事首夥各兇番。剋日拿獲。追賊給領。盡法懲辦。不准稍涉遲延。致洋人有所藉口。別生枝節等因。欽此。當經轉行該糧務委員等一體欽遵辦理。去後。並隨卽飭令勒限嚴緝。嗣成都將軍宗室臣岐元到任後。又經會同嚴札飭催。迅速妥辦。旋據委員知州楊鞏、打箭爐廳同知李忠清、巴塘糧務委員稽志文稟稱。前經拏獲夾壩工布曲批、策珠二名。並起獲原贓馬等件。給洋人認明承領。訊據工布曲批供稱。是夜行劫。有丁林寺喇嘛在內夥同搶劫。當又設法將喇嘛降巴納小殺。熟根堆二名獲案。提同工布曲批等質訊明確。供認不諱。並據隨同司鐸梅玉林之僱工聞天順等。認係當時

爲首兇犯。確切無疑。雖餘匪在逃未獲。而該四犯既據供證確鑿。自應照章懲辦。惟巴塘地方全係土番。獲犯並無監卡可禁。若令久稽顯戮。不惟滋擾事端。在洋人亦必藉口遲延。別生枝節。應請將情罪重大之工布曲批、殺熱根堆二犯。先行正法以昭炯戒。其策珠、降巴納小二犯。即押回拘禁打箭爐廳待質。一俟續獲餘犯。再行訊辦。庶免狡展。所劫各贓。除起獲外。據該教堂估計。應賠銀一千九百三十五兩七錢一分。惟此案雖係嚴匪爲首。而喜松工僧俗竟有多名在內夥劫。又該處甲球烏金澤旺。本係巖人。兩土司膽敢派令充當甲球。以致內訌外結。出此重案。是該巴塘正副土司與丁林寺堪布約束不嚴。均難辭責。所有前項贓銀。應飭令巴塘正副土司暨丁林寺堪布分別賠繳。以爲約束不嚴者戒。該教主畢天榮見如此辦理。兇犯既經正法。失贓亦復有著。心極悅服。毫無異議。當經領銀出具洋字圖記了案。切結以憑結案等情。具報前來。臣等查該員等辦理此案。甚爲妥速。並取具該教主畢天榮了案切結。尤爲結實可靠。惟三巖野番頻年攔搶行商。上年並拒斃駐藏幫辦大臣維慶。引馬人夫。實屬兇頑。此次又復劫殺洋人。雖畢天榮自知理屈。不與爲難。俾得速爲結案。而該匪等迭次越境搶劫滋事。若不將此案逸匪悉數拏獲。嚴行究辦。實無以示儆將來。現經批飭該糧員稽志文督飭該土司隨時購緝設法密捕。務將在逃餘匪上緊弋獲。盡法懲辦。庶野匪稍知斂迹。大道可期通暢。仰副聖主懷柔遠人綏靖邊圉之至意。下部知之。

27 辛亥。以福錕爲兵部左侍郎。岳林爲理藩院右侍郎。

28 以景瑞爲正黃旗滿洲副都統。貴恆爲正白旗蒙古副都統。維慶爲正紅旗漢軍副都統。

29 調李鴻藻爲吏部尙書。以毛昶熙爲兵部尙書。閻敬銘爲戶部尙書。畢道遠爲左都御史。游百川爲倉場侍郎。周家楣爲順天府尹。

30 以李鴻藻充武英殿總裁。

31 周恒祺以病免。以慶裕爲漕運總督。倪文蔚爲廣西巡撫。徐延旭爲廣西布政使。

32 賞加李慎副都統銜，作爲西甯辦事大臣。

33 以桂昂爲馬蘭鎮總兵兼總管內務府大臣。

34 諭。朕奉慈禧端佑康頤昭豫莊誠皇太后懿旨。三載考績，爲國家激揚大典。中外滿漢諸臣，有能恪共職守，勞績最著者，允宜特加甄敘。其有平庸衰老者，亦難曲予優容。茲當京察屆期，吏部開單題請詳加披閱。恭親王首贊樞廷，殫心輔弼，機宜妥協，懋著勳勞。著交宗人府從優議敘。大學士寶鋈，協辦大學士兵部尚書調任吏部尚書李鴻藻，戶部尚書景廉，署戶部左侍郎王文韶，同心贊畫，克慎克勤，均著交部議敘。大學士直隸總督李鴻章，任事實心，才猷闊遠。大學士兩江總督左宗棠，勳績夙著，勞瘁不辭。前兵部右侍郎彭玉麟，巡閱長江水師，宣力有年，任勞任怨，均著交部從優議敘。吏部尚書萬青藜，屢被參奏，衆望不孚。戶部尚書董恂，年力就衰，均著開缺。都察院左都御史董華，在上書房行走有年，精力未衰，惟辦事不無疏懈，著開缺以侍郎候補。仍在上書房行走。兵部右侍郎恩麟，理藩院右侍郎鐵祺，才具平庸，均著以原品休致。

35 諭。御史邵積誠奏請飭禁止接遞匿名書信等語。匿名揭帖，例禁甚嚴。若如所奏，近來投遞匿名書信不一而足，甚至刊刻成書，以絕無根據之詞肆口譁讎，顛倒是非，混亂觀聽。於朝政大有關係。著五城御史出示嚴禁。嗣後如有向京員私宅投遞匿名書信者，即將來人送交刑部嚴行究辦，以儆刁風。

36 李鴻章奏請添設張、獨、多三廳學額，下部議。

37 李鴻章奏。三品銜候選道徐建寅，前於光緒元年五月經總理各國事務衙門奏保堪備出使外洋之選。奉旨依議。欽此。該員先在上海機器局歷練有年，熟諳製造。嗣調赴山東總辦機器局。二年十月，經升任山東撫臣丁寶楨以該員綜核名實，條理精詳，奏懇恩施錄用。奉旨著俟經手事竣，送部引見。欽此。五年閏三月，將東省製造軍火等事辦理完竣。經山東撫臣文格給咨北上，行抵天津。適出使德國大臣李鳳苞奏調該員出洋，充當二等參贊。欽奉五年七月二十一日寄諭，著臣飭令迅速起程。前赴德國等因。欽此。當即轉飭遵照，並將原領山東

咨文。由臣咨透吏部存查。聲明俟回華再行給咨赴部在案。該員在德二年。因水土不服致病。稟由李鳳苞批准銷差回華。道出法國巴黎都城。經出使英國大臣曾紀澤委令齎送俄國新換約本進京投遞。該員於十月間回抵上海。醫治病痊。茲已來直。稟由臣照案給咨前來。查該員徐建寅。熟悉洋務。於船廠製造之學研究尤精。前由道銜候選郎中。經丁寶楨奏保奉旨送部。因遵往德國充當參贊。不克赴京。該員曾在晉賑案內加捐道員。並於閩廠生徒出洋肄業案內出力保加三品銜。現既銷差回華。自應以三品銜候選道仍遵前奉諭旨送部引見。候旨錄用。下吏部知之。

38 壬子。予湖南龍陽縣烈婦曾朱氏旌表。

39 乙卯。諭給事中彭世昌奏請將陣亡之軍功查明優卹等語。軍功何于珠、李寶林、晏鯤、周勳。均著該部查明。從優議卹。

40 銘安奏。奴才前以吉省應設民官甚多。因本地籌款維艱。勢難一齊舉辦。先請添設賓州廳、五常廳、敦化縣三處正印教佐等官。當於光緒六年十二月初八日專摺具奏。奉旨飭部核准。並由奴才委員試署在案。現在收取荒價。勸辦斗稅。又歷一年。積有成數。所有應行添設升改各缺。自當及時擬議。請旨遵行。查雙城堡地方。距省四百餘里。爲省城東北之門戶。界外均有民官治理。惟該堡與拉林地方公事。仍係旗員經管。未免向隅。奴才札派差委道顧肇熙前往查勘。何處可以添官建署。飭令繪圖稟覆去後。旋據該道稟稱。遵查雙城堡在省城東北四百八十里。本屬拉林舊地。自嘉慶年間移撥京旗。設立村屯。劃歸堡者東西相距一百三十里。南北相距七十里。四面仍皆拉林界。現在堡城商賈雲集。戶口繁多。較拉林爲盛。自應在該堡城內添設民官。以資撫輯。拉林但設分防。足以佐治。惟地界則當併拉林所屬統歸雙城管轄。方覺整齊。東面本與阿勒楚喀以古城店分界。古城店之東。今屬賓州廳界。店西應屬雙城。東南本與五常堡以莫勒恩河分界。河南今屬五常廳界。河北應屬雙城。南面西面均與伯都訥以拉林河分界。河南河西爲伯都訥廳界。河東河北應屬雙城。北面本與黑龍江以松花

江分界。江北爲呼蘭廳界。江南應屬雙城。如此劃分。雙城地勢實居拉林之適中。爲省北之屏障。形勢宏敞。庶務殷繁。將來建立衙署監獄以及巡檢捕衙修造城垣祠廟。均有隙地。足敷布置。第東南距拉林一隅。有遠在百里以外者。尙恐鞭長莫及。兼顧難周。應請於拉林地方。設立分防衙署。緝捕之餘。藉資佐理等語。並繪具地圖。稟覆前來。奴才前請在雙城堡拉林地方添設撫民通判分防巡檢等官。並擬將堡城總管一缺裁撤。改設協領一員。業經附片瀝陳。仰蒙俞允在案。既據該道覆勘明確。稟稱雙城堡商賈輻輳。事務殷煩。亟須添設民官以資治理。請仍照前奏在雙城堡設立撫民通判一員。名曰雙城廳。另設巡檢兼司獄事一員。管理監獄。訓導一員。振興學校。拉林分設巡檢一員。卽歸雙城廳統屬。其雙城堡原設總管一缺。卽請裁撤。改設協領一員。專司緝捕及一切旗務。除雙城拉林土稅一項。照新設賓州五常各廳均歸旗署徵解之例。仍由雙城拉林旗署徵解外。其餘一切租稅。均歸新設民官徵收。詞訟命盜案件。均歸民官審理。以一事權。此雙城堡拉林擬設廳官。敦佐各員之情形也。又查伊通距省二百餘里。爲省西最要咽喉。向歸吉林廳管轄。地方遼闊。治理難周。必須添設民官。劃疆分治。方能通聲教而輯人民。奴才札派差委道顧肇熙。本任吉林廳同知善慶。前往查勘。何處可以添官建署。飭令繪圖稟覆去後。旋據該道等稟稱。勘得伊通河在省西二百八十里。至威遠堡門二百七十里。係奉天界。北至長春廳一百餘里。南至圍場荒地二百餘里。爲長吉兩廳之門戶。吉黑兩省之通衢。前山後河。中有大道。勢極扼要。當衝。商賈雲集。居民櫛比。履勘周圍東西五里。南北三里。能於此修城建署。並設倉庫監獄學祠廟。確於地理相宜。民情協洽。至於勘分界址。正南至小伊通河七十里。河南屬奉天界。河北屬伊通。正西至威遠堡門二百七十里。門西屬奉天界。門東屬伊通。東南至那爾嶺三百四十里。嶺南屬吉林。嶺北屬伊通。西南至黑瞎子背嶺三十里。嶺南屬奉天界。嶺北屬伊通。西北至二十家子邊壕。壕北屬奉天界。壕南屬伊通。正東自距伊通五十里之石頭河子分界。河東屬吉林。河西屬伊通。東北自距伊通一百三十里之小河臺邊壕分界。壕東屬吉林。壕西屬伊通。如此劃分。似屬整齊。惟伊通河設立有司衙門。距圍荒二三百里。難期兼顧。今勘得迤南一百六十里之磨

盤山。東西寬三里。南北長五里。前通當石河。至輝發河。入大江。後靠椅子等山。局勢寬平。居圍荒之適中。亦宜添設分防以輔其治。伊通既擬添設正印官。則所分界內舊有租賦。自應均歸新設之員經徵。除俟圍荒竣後。照例升科報部。歸伊通徵租外。所有石頭河子小河臺迤西迤南。現擬於吉林府分界之處。應徵地丁銀米約數。在二萬零五百兩有奇。均劃歸伊通經徵。以期撫字催科。責成並重。惟吉林廳原徵賦額。不過五萬兩有奇。今遽劃出少半。亦應設法籌補。查圍場邊荒。前於咸豐同治年間。先後放荒地十牌。共地六萬七千三百餘晌。現在該處正當勸丈。併浮多計之。約在十萬晌。此項地畝。每晌向收大租錢六百元。小租錢六十文。由戶司經徵。而地屬吉林廳管轄。遇有佃民詞訟事件。均歸廳官管理。如將大小租撥歸吉林府徵收。實屬官民兩便等語。並繪具地圖稟覆前來。奴才詳核該道等所稟各節。均尙妥協。即請在伊通設立知州一員。名曰伊通州。該州舊有吉林分防巡檢一員。改爲吏目。管理伊通監獄。添設訓導一員。振興學校。磨盤山分設巡檢一員。即歸伊通州統屬。至勘分界址及經徵租賦審理詞訟。自應悉如所稟辦理。此伊通磨盤山擬設正印教佐各官之情形也。夫新設各缺。既已措置咸宜。治理可期一律。而舊設三廳。亦應變通盡利。政教庶免兩歧。溯查奴才前奏變通官制增設府廳州縣一摺。奉到部咨內開。該將軍請將吉林廳理事同知升爲府治。改設知府。原設吉林廳巡檢。改爲府司獄。管司獄事。伯都訥原設理事同知。改爲撫民同知。原設榆榆樹巡檢兼管司獄事。長春廳原設理事通判。改爲撫民同知。原設巡檢兼管司獄事。農安添設照磨一員。靠山屯添設分防經歷一員。並據奏稱。吉林三廳。向因專管旗人戶婚各事。皆用理事人員。今民戶衆多。政務殷煩。與從前情形不同。請與新設之同通州縣均加理事銜。滿漢兼用等語。臣等查該將軍所奏。添設各缺及請加理事銜。滿漢兼用之處。自係因地制宜。整頓吏治起見。惟添設改設各缺。總期官民相安。方臻妥善。請旨飭令該將軍體察情形。通籌全局。詳細分別奏明辦理等因。奏奉諭旨。依議。欽此。欽遵咨行前來。伏思吉林廳理事同知駐守省垣。幅員遼闊。管轄本屬難周。且邇來荒地日闢。民居日密。戶婚詞訟命盜之案。倍多於前。只以同知獨任其事。權輕責重。地廣事煩。難免於顧此失彼之虞。擬請將吉林廳

理事同知一缺升爲府治。改設知府。名曰吉林府。仍照熱河承德府、奉天昌圖府之例。仍管地面詞訟錢糧各事。新設之伊通州歸其統屬。並將原設吉林巡檢一缺升爲府司獄。管司獄事。學正一缺升爲府教授。以符體制。其吉林府應分界址。東至張廣才嶺爲界。計二百里。外至敦化縣東南至樹林子荒爲界。外至官山西南至太陽川爲界。計二百餘里。外至伊通州西至石頭河子爲界。計二百三十里。外至伊通州西北至小河臺爲界。計二百一十里。外至長春廳北至法特哈邊門爲界。計二百一十里。外至伯都訥。東北至舒蘭荒耘字四牌爲界。外至五常廳。如此劃明疆界。各專責成。庶免互相推諉。至伯都訥廳理事同知一缺。照原奏改爲撫民同知。加理事銜。長春廳理事通判一缺。毋庸升爲撫民同知。請改爲撫民通判。加理事銜。農安地當衝要。生聚日繁。請照原奏添設分防照磨一員。歸長春廳統屬。靠山屯地方民戶無多。該廳可以兼顧。毋庸另設分防經歷。此吉林舊設三廳擬請升改各官之情形也。惟本年十月十一日接准吏部咨開。以奉天現無理事同知通判員缺。故有准用揀發曾任實缺正途不分滿漢補用明文。該將軍請將吉林理事同通三廳仿照奉天章程由揀發曾任實缺正途不分滿漢酌量補用之處。應毋庸議等因。維時吉林舊設三廳尙未奏請升改。均係理事同知通判。格於成例。是以吏部奏駁。查奉天昌圖廳同知改爲知府。請由外揀員升補。與京理事通判改爲撫民同知。亦請不論滿漢兼用均加理事銜。照例將揀發人員請補。均經部議奏准在案。現在吉林廳理事同知升爲知府。應請仿照奉天昌圖府之例。由外揀員升補。伯都訥應改爲撫民同知。長春廳改爲撫民通判。亦請仿照奉天與京撫民同知之例。請仍由揀發曾任實缺各員不論滿漢酌量補用。庶與新設各廳縣統歸一律。實於政治有裨。下部議奏。

41 丙辰。諭。廣壽等奏驗看月官查有冒名頂替情弊請飭部訊辦一摺。捐納府經歷（何）（吳）璟、縣丞張日焜、從九品徐福疇、經廣壽等查詢各該員履歷。均不相符。顯係冒名頂替。吳璟、張日焜、徐福疇均著刑部訊明。照例懲辦。

二月

1 丁巳朔。祭先師孔子廟。遣靈桂行禮。

2 戊午。祭社稷壇。遣世鐸恭代行禮。

3 己未。朝日於東郊。遣隆懃恭代行禮。

4 以江蘇長洲、元和縣文廟失火。飭江蘇巡撫查明看守不慎。該管各官據實參奏。交部議處。並著籌撥款項。迅速興修。

5 諭。御史英俊奏。風聞戶部已滿書吏韓士傑。即韓仲敏。孫際昌。即孫春圃。把持庫務。每至收發餉銀。刁難勒索。韓士傑於伊姪韓秀甫。接充書吏後。仍在身後辦事。韓秀甫近來並不當差。有伊戚史恩濤。朱貴卿。滕混。冒替嚇詐招搖。工於作弊。請飭查究等語。庫儲重地。豈容蠹役盤踞把持。藉端勒索。著管理三庫事務大臣。查明究辦。以清積弊。而重庫儲。

6 庚申。諭。張之洞奏。請調員差委等語。翰林院編修王文錦。著發往山西。交張之洞差遣委用。降調知府李秉衡。著俟引見後。再行請旨。

7 諭。前據裕祿奏。調道員高崇基差委。當經降旨允准。茲據張之洞奏稱。該員前在山西知縣任內。尚有經手未完事件。請飭前往清理等語。著李鴻章飭令該員。迅赴山西。俟經手事件完結。再行前赴安徽聽候差委。

8 諭。本年輪應查閱山東、河南、江蘇、安徽、江西五省營伍之期。山東即派任道鎔。河南即派李鶴年。江蘇即派左宗棠。安徽即派裕祿。江西即派李文敏。逐一查閱。認真簡校。如有訓練不精。軍實不齊者。即將廢弛之將弁。據實參奏。毋得視為具文。

9 恭鏜奏。准護理陝甘總督臣楊昌濬移咨。轉准刑部咨。內開。遵議御史胡隆洵奏。請將盜案仍照舊例分別首從辦理一摺。經該部奏請飭下各省督撫將軍都統府尹體察地方情形。將夥衆持械強劫案件。仍照成例分別題奏。奉旨依議。欽此。欽遵咨照到營。仰見皇上於欽恤刑獄之中。仍寓因地制宜之意。欽佩莫名。奴才伏查辦